



Nivi Olsen
Inatsisartunut ilaasortaq, Demokraatit

§ 37 nr. 40/2021-mut akissut – inuit pisinnaatitaaffii pillugit ilinniartitaaneq atuartitsinerlu

02-06-2021
Sagsnr. 2021 - 10057
Akt nr. 16854663

Postboks 1029
3900 Nuuk
Tlf: +299 34 50 00
Email: ikin@nanoq.gl
www.nanoq.gl

Asasara Nivi Olsen

Qujanaq apeqqutinnut, Inatsisartut suleriaasiat malillugu apeqqutilliinernit. Ataani akissavakka.

1. ”Inuit pisinnaatitaaffii pillugit ilinniagaqarneq ilinniartitsinerlu – Kalaallit Nunaanni killiffik 2021” nalunaarusiami innersuussutigineqartut ataani taakkartorneqartut pisortanit piviusunngortinneqassappata aningaasatigut allaffissornikkullu suut kingunerissavai:

a. Immikkut pisariaqartitsisunut ilinniartitsisut annertuumik ilinniagaqarnermikkut – piginnaasamikkullu pitsanngorsarnissaat qularnaassallugu, tassani pingaartumik meeqqanut inuuniarnermikkut unammilligassaqartunut kingunerlutsitsinertik imaluunniit sumiginnarneqarsimanertik pissutigalugu?

Akissut: Meeqqat atuarfiannit Ilinniartitaanermut Pisortaqarfimmut 2019/2020-mi atuartitsiviusumut oktoberimi nalunaarummi, meeqqat atuarfianni atuartitsinerup 24%-ia immikkut atuartitsinermut atorneqartartoq, tassanga 63,7%-it missaat immikkut atuartitsinissamut siunertaqarluni aallartinneqarsimasuupput. Atuartunit 78,1% nukappiaraapput, immikkut atuarinneqartartut, 21,9% niviarsiarallutik.

Atuartsivimmi 2019/2020-mi 7382 meeqqat atuarfiini atuartuupput. Taakkunanga atuartut 822-t immikkut assigiinngitsuni atuarinneqartarput. Ukiumi tassani atuarfiusumi 1044 meeqqat atuarfiini ilinniartitsisuupput. Taakkunanga 321-t immikkut assigiinngitsuni ilinniartitsisuupput, tassanga 12-t ilinniartitsisutut ilinniarsimasuni saniatigut perorsaanermik ilinniarsimasuupput.

Immikkut perorsaaneq Ilinniartitsisunngorniærnermi Iisimatusarfimmi fag-it ilagaat. Anguniagaavoq, ilinniartup meeqqat inuusuttullu pillugit ilisimasaqalerlunilu paasisimasaqalernissaa ilinniartitsinerni assigiinngitsuni unamminarsinnaasuni kiisalu piginnaasanik peqalerluni sakkussanillu peqalerluni ilinniartitsinermini ataasiakkaatut pisariaqartitaat anguniagaallu eqqarsaatigalugit. Immikkut ilisimasaqalerniarluni fag-iunngilaq imaluunniit immikkut pisariaqartitsisunut ilinniartitsisunngorniærnerunani.

Meeqqat atuarfiini ilinniartitsisut piginnaasaannik ineriartortitsineq ingerlaavartuuvuq, aamma immikkut ilinniartitsisunut, meeqqanut unammartumik angerlarsimaffimmi inissimasunut timikkut tarnikkulluunniit innarlerneqarsimasunut imaluunniit

sumiginnagaasimasunut – atuartunut, meeqqat atuariini nalinginnaasumik klasse-ni aamma nassaassaasuni.

Ilinniartitaanermut Aqutsisoqarfik ingerlaavartumik pikkorissaasarpog pingaartumik immikkut ilinniartitsineq tamaat isigalugu sumiiffikkaartumik. Ilinniartitaanermut Aqutsisoqarfik Ilinniartitsisunngorniarnermi Ilisimatusarfillu atuartitsiviusumi 2019-20-mi ataatsimoortumik pikkorissaanissamut atuartunut immikkut pisariaqartitsisunut aamma immikkut atuartitsineq eqqarsaatigalugu neqerooruteqarpoq, tamannali taamaatiinnarneqarsimavoq Covid19 peqqutigalugu.

Atuariit kommunillu periarfissaqarput sumiiffikkaartumik ineriartortitsinissamut suliniutinik qinnuteqarnissamut Ilinniartitaanermut Aqutsisoqarfimmu Ilinniartitsisunngorniarnermi Ilisimatusarfimmullu. Ineriartortitsinermut suliniut tassaasinnaavoq immikkut ilinniartitsineq imaluunniit meeqqat inuuniarnermikkut unammilligassaqtut timikkut tarnikkullu innarlerneqarsimasunut imaluunniit sumiginnagaasimasunut suliniuteqarnermi.

Ilinniartitsisunngorniarnermi Ilisimatusarfik immikkut perorsaariaatsimut sammisumik ilinniarnissamut neqerooruteqalertussaavoq ukiakkut 2021 aallartittumik.

Takorloorneqarsinnaapput piginnaanngorsarnerit arlaqtut. Massakkuugallartori nalorninarallarpoq qanorpiq ikkumaarnissaa, qanorlu qaffassaanerit isikkoqassanersut, sorliillu pitsaanerpaassanersut. Tamanna sukumiisumik qulaajaanikkut pisariaqarpoq ilinniartitsisut immikkut atuartitsinermi piginnaasai qulaajassallugit.

Ilinniartitsinerup- piginnaasanillu qaffasaanerup immikkut ilinniartitsisut akornanni unaasinnaavoq assersuutigalugu angalasartunik pilersitsineq angalasartut pigineqareersut ataanni, pilersinneqarsimasumut kalaallit-qallunaallu meeqqanut pisariaqartitsisunut suliniutaanni aallartinneqarsimasumi suliniut 3-mik taallugu, ulluinnarni sullissisutut sulisuni siunnersuinerimik aqqutissiuussinermillu imaqtumik.

Ilinniartitaanermut Aqutsisoqarfiup nalilerpaa, angalasartunik pilersitsinermi pisariaqartinneqassasut atorfitt pingasut, ukiuni pingasuni ingerlasussami aningaasarsianut- angalanermullu aningaasartuutitut qaffassaataasussamut kr. 8.000.000, aqutsisoqarfimmu tunniunneqartussat.

Ilanngullugu tassunga suliniummu annertusaanermi piunasaqaataassaaq, MISI-p kommunip ataaniittup nukittorsarneqarnissaa soorlu tarnit pissusaannik ilisimasallit amerlillugit, tamannalu aamma kommuninut aningaasarsiassanut annertusaataassaaq.

b. Naqinnernik ilisarinnissinnaanngitsunut misissuummik nunatsinnut oqaatsitsinnullu tulluussakkamik pilersitsineq atuutsitsilernerlu?

Akissut: Arlalinnik unammilligassaqtarpoq, kalaallisut naqinnernik ilisarinnissinnaanngitsunut misissuinerimut atugassamik pilersitsinissamut. Assersuut, oqaatsit ataqtigiinnerat oqaatsinut allanut naleqqiullugu allaanerujussuuvoq. Soorlu, immikkut oqaatsit pillugit ilisimasalimmit misissuut ineriartortinneqartariaqarmat. Kalaallit Nunaat aamma naqinnernik ilisarinnissinnaanngitsunut sammisumik atuarfeqanngilaq, atuartut atuarsinnaanerinik paasissutissanik katersaqanngilaq, ilutigalugulu Kalaallit Nunaat naqinnernik ilisarinnissinnaanngitsunut ilisimatusartoqtaranilu tassunga tunngasumik ilinniarsimasunik peqtarani.

Kalaallit naqinnernik ilisarinnissinnaangitsut meeqqat inersimasullu misissornissaannut ineriartortitsinissami pisariaqarpoq, misissuutip sumut atornissaa, meeqqat inersimasullu ataasiakkaat misissorneqarnerisa sumut atornissaannut siunertaq sunaanersoq paasissallugu.

Ilanngullugu aalajangerneqassaaq kikkut piginnaasallit, naqinnernik ilisarinnissinnaanginnermut misissuummik suliaqassanersut aamma inunnut naqinnermut ilisarinnissinnaangitsunut naliliissanersut.

Ilinniartitaanermut Aqutsisoqarfik 2020-mi 1.-3. klasse-nut atortussanik naammassinnissimavoq, anguniarneqarluni atuartut kikkut naqinnernik ilisarinnissinnaangitsutut inissisimanissamut qaninersut nassaariniarlugit tassuuna atuarsinnaanermut ilinniartitsinermi toqqaannarnersumik suliniuteqarfiginissaat anguniarlugu. Tassani eqqartorneqarpoq misissueriaaseq naqissusiiffiunngitsaq, meeqqat atuarfianni massakkut atorneqartartoq.

Ilinniartitaanermut Aqutsisoqarfiup nalilerpaa, naqinnernik ilisarinnissinnaangitsunik misissuineq atuartunut namminerimi iluaqutaanissaa, kisianni sukumiisumik suliniutiginerani atuartumut atuarnissamut- allannermulluunniit ajornartorsiortumut ikorfartuutaanissaanut iluaqutaassasoq.

Nunat naqinnernik ilisarinnissinnaanginneq assigiinngitsunik suliniuteqarfigisarpaat. Qallunaat Nunaanni naqinnernik ilisarinnissinnaanginnermut misilitsissut atortarpaat, qanorlu atuartup naqinnernik ilisarinnissinnaanginnermut eqqugaasimatigenera aallaavigalugu IT-mut sakkussanik periarfissinneqartarpoq, qulakkeerinnittussaq, atuartumut ilinniakkaminik naammassinnissinnaanerutikkumallugu kiisalu sunngiffimmi sammisassanut peqataatissinnaajumallugu.

Findlandimi naqinnernik ilisarinnissinnaanginnerup naqissusernissaa pingaaruteqanngilaq, akerlianilli atuartup pisariaqartitai aallaavigalugit atuartitsinissaq ukkatarineqartarpoq. Ilinniartitaanermut Aqutsisoqarfiup misissuinnermut atortui finsk-inut qaninnerupput atuarnermut- allannissamullu ajornartorsiuteqartunut suliniuteqarnermi.

Sakkussarpassuit piffissarujussuarlu pisariaqartinneqarput kalaallisut naqinnernik ilisarinnissinnaanginnermut misissuummik ineriartortitsinissaq. Ilinniartitaanermut Pisortaqaarfiup nalilerpaa, ineriartortitsineq minnerpaamik ukiunik 3-5-nut sivissuseqarnissaa. Misileraat oqaatsinik, atuarnermik, atuarnermik- aammalu allannermik ajornartorsiutilinnik, ilisimasalinnik ilinniarsimasunillu ineriartortinneqassaaq, inuit misileraammik ineriartortitsinermit ilisimasallit, naatsorsuusiortartut ilinniakkamut tunngasumik siunnersuisartut soorlu ilisimatuut, kiisalu suliniummut misissuillutillu suliarinnillutik suleqataasut marluk, ineriartortitsisut eqaallisaasullu. Nalilerneqarpoq, suliarineqarnerani sulisut 8-10 akuutinneqarnissaat. Ilanngullugu misileraatit ineriartortitsinerup siunertaraa, sulisussarsiorsinnaaneq suliniummut suleqataasussanik pitsaasunik aamma suleqatissatut isumaqatigiissuteqarfigisinnaasanik.

Suliniut ukiumut 2.000.000 kr.-inik akeqartussatut naatsorsuutigineqarpoq, katillugit 6.000.000-10.000.000 mio.kr.-eqartussatut. Taassuma saniatigut misileraatissap eqqakkiartuaarnerani aningaasartuutissat ilanngukkumaarput.

c. Misissuisoqassasoq, meeqqat atuarfianni immikkut atuartinneqartut klassiini atuartut qassit, meeqqat atuarfiannit naggataarutaasumik misilitsinnissamut

innersuunneqarlutillu naammassinnittartut qassiunersut, tamatumalu kingorna piujuartussamik kisitsisinik tassunga tunngasunik katersisalernissaq?

Akissut: Naalakkersuisut ukiut tamaasa atuartuniit paasissutissanik sukumiisunik katersisarput, meeqqat atuariiini soraarummeernissamut peqataangissutaasunik.

Ilinniartitaanermut Aqutsisoqarfiup suliarinikuaa ilitsersuut "Immikkut peqquteqartumik misilitsinneq aamma peqataangissutaasumik", tassani anguniagaavoq malittarisassat sinaakkutillu misilitsinnissamut nassuiaaserneqarnissaat kiisalu periarfissat ersarissarnissaat, atuariup meeqqat atuariiani atuartunik misilitsittusanut piareersarnermi atortakkanik, timimikkut aamma/imaluunniit pisinnaasamikkut appasittumik inissisimasunut imaluunniit assingusumik ajornartorsiutilinnut. Immikkut akuerisamik misilitsinnissamut atuinerup atuortoq periarfissittarpaa inaarutaasumik misilitsinnissamut peqataaneq ikiorsiissutit atorlugit imaluunniit sinaakkutit iluanni atortunik, atuartut ataasiakkaat pisariaqartitaat aallaavigalugit – taakku atuartut immaqqa misilitsinnissaminnit peqataatinneqanngitsoorsimassagaluarput.

Naalakkersuisut kisitsisaatigaat, atuartut qassit immikkut klasse-niinnerisut, nuna tamakkerlugu aamma atuarifikkuutaartumik. Naalakkersuisut aamma kisitsisaatigaat, atuartut qassit, misilitsinnginnissaat anguneqarsimanersoq, aamma atuartut taakku immikkut klasse-ni atuarsimanersut.

Misissuineq aamma nalunaarusiorneq paasissutissat pigisat malillugit naatsorsuutigineqarpoq sapaatip akunnerini pingasuni suliarineqassasut AC fuldmægtig/konsulentimit, tamannalu naleqarpoq 37.000 kr.-it missaannik.

d. Inuit pisinnaatitaaffiit tunngasunik nunatsinnut tulluarsakkamik ilinniartut ilinniutigisinnaasaannik ilinniusiortoqarnissaa, kiisalu ilinniartitsisut attuumassutillit inuit pisinnaatitaaffiit ilinniartitsinissamut piginnaasaannik qaffasaanissamut periarfissiinissaq, assersuutigalugit ilinniaqqiffigineqarnissaat imaluunniit ilinniarnep nanginnerani?

Akissut: Inuttut pisinnaatitaaffiit pillugit nalunaarusiami kapitali 7 ima allaqqavoq "Ilinniartitaaneq atuartitsinerlu, Kalaallit Nunaannit killiffik 2021"-mi innersuussutigineqarpoq, Ilisimatusarfik Isumaginninnermi perorsaanermut Seminaria ineriartortitsisoq ilinniagaqartunut atuartitsissutissanik inuit pisinnaatitaaffiit pillugit.

Nalunarpaq aningaasatigut kingunissaa eqqoriassallugu atuartitsissutissanik nutaanik ineriartortitsinermi, tassani apeqqutaajumaarmat qanoq annertutiginera aamma assilissatigut atortussat eqqarsaatigalugit, kiisalu atortussat naqqaniik ineriartortinnissaat eqqarsaatigalugu, imaluunniit allagartalersuisoqassanersoq atortussat pioreersut atorlugit.

Assersuutigalugu ilinniartitaanermut Pisortaqarfimmit Ilinniusiorfik paasissutissiivoq, atuartitsissutissanik 43-nik quppernilinnik ineriartortitsineq akeqassasooq 272.000 kr.-inik. Tassani ilaavoq atuakkiortumut, ilusilersuisumut, grafiker-imut, naqterivimmut, nutserinermut assigisaannullu aningaasartuutit. Taassuma saniatigut redaktør-ip piffissamik sulinermini atuinissaa.

e. Misissuisoqassasoq, qanoq annertutigisumik piginnaasaqarluartunik ilinniarsimasunillu sulisunik amigaateqartoqarnersoq, aammalu atuartut immikkut pisariaqartitsisut naammattumik ikiorserneqartarnersut?

Akissut: Misissuinissaq sioqqullugu pisariaqartinneqassaaq, nalilersussallugu naammattumik ikorfartorneqarnermi sulerieseq sunaanersoq, aamma kikkut tamanna nalilersussaneraat.

Aningaasatigut kingunissai misissuineri taamaattumi apeqqutaajumaarpoq, qanoq annertutiginersoq takujuminartiginersorlu misissuineri kissaatigineqarnersoq. Sukumiisumik misissuineq, nuna tamakkerlugu, imaattariaqarpoq annertussuttip pitsaassutillu kisitsisinngorlugit katersorneqarnissaat, uani apersuineq takusallu qanoq ittueneri ilanngullugit.

Misissueriaaseq annertussusaalu aallaavigalugit Ilinniartitaanermut Pisortaqrifiup nalilerpaa pitsaasumik misissuineq immikkut ilinniartitsinerup ataani akeqarumaartoq 1.500.000 – 2.500.000 kr.-it.

f. Nuna tamakkerlugu inuusuttut ilinniarfiini atugarissaarnerup misissuiffigineqartarnissaa avammut saqqummiunneqartartunik, ilaatigullu ilinniakkamik unitsitsiinnartartut peqqutaat ilisimaaralugit angusassanik toraagaqartumik iliuseqarneq atuartut atugarissaarnerisa qaffassaavigineqarnissaat angujumallugu?

Akissut: Inuunermi atukkat atuarunnaarnerullu peqqutai pillugit misissuinerit paasissutissanillu katersinermit katersukkallu suliarineri ataqatigiissarnerilu suliniuteqartunit aqutsisup ataqatigiissassavai, nalilersuineq saqqummiussinnginneq sioqqullugu peqqartinnagu. Naatsorsuutigineqassaaq, aningaasatigut kingunissaa pisortanit ukiumut suliaqarnermut naatsorsorneqarumaartoq suliap paasissutissanik katersinerup atuarfinniit paasissutissat pineqareerpata.

Ilinniarnertuunngorniarfiup iluani piffissami 2013-2017 GUX avataaniit nalilerneqarsimavoq, uani atuartut inuttut atugarisaat ilanngullugu. Sisamariarluni nalilersuereernerup kingorna nalilersuinerit nutaartaqarsimanngillat, taamaattumillu aalajangiunneqarluni avataaniit nalilersuisarnerit ukiut tallimakkaarlugit pisassasut. Nalilersuinerit nalunaarusianiipput tamanit takuneqarsinnaallutik Iserasuaat iserfigalugu. Tassani ingerlaavartumik ilinniarnertuunngorniarfiit immikkut nalilersorneqartuarput.

Epinion: "Ilinniarnertuunngorniarfiup nalilersorneqarnera. Suleqatigiiaat akimorlugit nalunaarusiaq".

https://iserasuaat.gl/emner/gux/lovqivning/meddelelser-fra-departementet?sc_lang=kl-gl
https://iserasuaat.gl/emner/gux/lovqivning/meddelelser-fra-departementet?sc_lang=da

Taamaatiinnartartunut peqqutit pillugit nalunaarusiaq suliarineqarsimavoq, soorlu:

Sano, Naja Skadhauge 2017: "TUNNIUTIINNAQQINNIANNGILANGA"

<https://naalakkersuisut.gl/~media/Nanoq/Files/Attached%20Files/Uddannelse/DK/GU/Frafald%20%20Fasstholdelse%20GUX%20Nuuk%202017%20kort%20versionDK.pdf>

Europæiske Union sinnerlugu ACE International Consultants: "Study of dropout and completion at Vocational Education and Training programmes in Greenland"

<https://naalakkersuisut.gl/~media/Nanoq/Files/Attached%20Files/Uddannelse/Study%20of%20dropout%20and%20completion%20at%20Vocational%20Education%20and%20Training%20programmes%20in%20Greenland%20DK.pdf>

Olsen, Nivi 2014: Ilinniakkamik unitsitsiinnartarneq, Kalaallit Nunaanni inuiaqatigiinni ajornartorsiut. Inuiaqatigiilerinermut ilisimatusarnermullu Institut, Ilisimatusarfik.

<https://da.uni.gl/media/40858/nivi-olsen-speciale.pdf>

Kjær, Lotte 2010: Ilinniakkamik unitsitsiinnartarneq pillugu misissuineq 2010.

Ilinniarnertuunngorniarfinni ilinniakkamik unitsitsiinnartarneq pillugu misissuineq, IKIIN.

<https://naalakkersuisut.gl/~media/Nanoq/Files/Attached%20Files/Uddannelse/DK/Frafaldsunders%C3%B8gelsen%202010.pdf>

Taamaatiinnartartut peqqutaat pillugit ingerlaavartumik nalilersuinerit ingerlanneqartarput. Assersuutigalugu ilinniartunik aqutissiuussisut, ingerlaavartumik atuartut ataasiakkaarlugit killiffissiorneqartarput, uani aamma ilinniakkamik unitsitsiinnartarneq pillugu apersorneqartarlutik.

Suliniutip nalunaarutaata tamanut saqqummiunneqarnissaa aningaasatigut kingunissaa apeqqutaajumaarpoq, nalunaarusiap naqitanngorlugu saqqummiunneqarnarnersoq imaluunniit Namminersorlutik Oqartussat nittartagaanni saqqummiunneqassanersoq. Nalunaarusiaq naqitanngorlugu aamma saqqummiunneqassappat, aningaasartuutinit ilanngunneqassaaq naqitanngortitsineq qanorlu amerlatigisunik naqitanngortitsineq kiisalu suliniutip ingerlanneqarneranut tunngasut ilanngullugit. Aningaasartutit pillugit imaassinnaavoq aamma apeqqutaassasoq sumi naqitaliornerit assigisaallu ingerlanneqarnersut.

Apeqqutaalluni, suut suliniutit aallarnisarneqarsimanersut, pisortat naatsorsuutigissavaat aningaasartuutit malitseqartitsinermit assigisaannilu attuumassuteqartuni aamma anguniakkani suliniutini inuttut atugarisat kiisalu atuarunnaartarnermut tunngasut pillugit.

Aningaasatigut sunniutit pisortanut aatsaat naatsorsorneqarsinnaassapput paasissutissat suliniutaasimasut pillugit pigineqalerpata, soorlu inuttut atukkatigut nukittorsaanissamut kiisalu atuarfinni atuarunnaartarnerup apparsarnissaa pillugu. Ilanngullugu aningaasatigut sunniutinit apeqqutaajumaarput suliniutit, qanoq annertutiginerat aamma atuarfiit qassit suliniuteqarfigineqarnissaat apeqqutaassalluni. Atuarfiit tamarmik naatsorsuutigineqassapput suliniuteqarfigineqartussani kr.-nit annertussusaat.

2. Illoqarfinni minnerni nunaqarfinnilu ilinniartitsisunik ilinniagaqarsimasunik amerlanernik kajumissaarinissamut uninngaannarnissaannullu Naalakkersuisut suliniuteqarusuppat soorlu assersuutigalugu suleqatigiiliornikkut imaluunniit ilinniartitsisut paarlaaqatigiittarnerisigut nunaqarfinni atuarfiit illoqarfinnilu atuarfiit akornanni?

a. Taamaassappat paaserusuppara, suut suliniutit ingerlanneqarnersut.

Akissut: Nunaqarfinni ilinniartitsineq unammillernartuaannarsimavoq ilinniarluarsimasunik ilinniartitsissusaaaleqineq ajornartorsiutaajuaannarmat. Pingaartumik ilinniartitsisut amigaatigineqarput, nunat allat oqaasiinik ilinniartitsisinnaasut kiisalu matematikkimi ilinniartitsisinnaasut, taakkunani piginnaasat ilinniarfinnut allanut ingerlariaqqiffinnut apeqqutaasarmata.

Ilinniartitsisut, nunaqarfinni ilinniartitserusuttut, ullumikkut ajunngitsorsiassanik neqeroorfigineqartarput, uani immikkut sipaagaqartitsinermik aqqissusaaq ilaallutik immikkut ukiumut naatsorsuinernut attuumassuteqartunik, sumiiffimmut tapeq, ukiumut sulingiffeqarluni angalaneq kiisalu inimit akiliutit appasissut. Taassuma saniatigut kommunit misileraasimapput ilinniartitsisunik angalasartunik assigiinngitsunik aqqissuusillutik tassuunakkullu suleqatigiisitamik atuarfiit akornanni pilersitsisimallutik. Ilinniartitsisunngorniarfimmi ukiut tamaasa aalaakkaasumik ilinniartitsisunngortoqartaraluartoq, najugaqarfinni minnerusuni ilinniartitsisut tamakkernissaat ajornartorsiutaajuaannarsimavoq, ilaatigut najugaqarfiit qanoq ittuuneri aallaavigalugit atuarfeeqqat atuartukitsut ilinniartitsisorpaalunnik pisariaqartitsisarmata, ilinniartitsisullu arlallit illoqarfinni annerni najugaqarusuttarmata neqerooruteqarnerusuni ulluinnarnilu periarfissagissaarnerusuni. Nassuerutigalugu, ilinniartitsisunik ilinniarsimasunik pissarsiniartarnerup ajornarnerulernissaa illoqarfinni nunaqarfinnilu, taava eqqarsaatigisariaqarpoq, qanoq ililluni ilinniartitseriaatsip nukittorsarnissaa soorlu teknologi nutaaq atorlugu qarasaasiakkullu ilinniartitsineq ilanngullugu.

Naalackersuisut kissaatigaat kommuninut naaperiuseqarnissamik suliniuteqarnissaq sulisussarsiornermi aamma tiggummiinnarnissaannut ilinniartitsisut ilinniarsimasut pillugit illoqarfinni minnerni nunaqarfinnilu.

Taassuma saniatigut nalunaarutigineqassaaq, Kommunalbestyrelsep akisussaaffigimmagu, Inatsisartut inatsisaat nr. 15, 3. december 2012 meeqqat atuarfiat pillugu, § 43, stk. 1 innersuussutigalugu, kingullermik allangortinneqarsimasoq Inatsisartut inatsisaanni nr. 21, 13. november 2017-imi, kommunit atuarfeqarneq akisussaaffigigaat misissussallugulu, meeqqat tamarmik kommunimi atualertussaataasut allatsissimanissaat imaluunniit ilinniartinneqarnissaat pillugu, piumasarineqartut, meeqqat atuarfiini nalinginnaasumik piumasaqaataasut malillugit.

b. Taamaattoqanngippat kissaatigaara tassunga suna peqqutaanersoq paasissallugu.

Akissut: Takuuk qulaani akissut 2.a.

3. Meeqqat elevhjemmini najugaqartut ilaqutaasalu akornanni attuumassuteqarnerisa atugarissaarnermikkut isumassorneqarnermikkullu ikorfartorneqarnissaannut Naalackersuisut suliniutit suut aallartissallugit pilersaarutigaa?

Akissut: Ilinniartitaanermut Naalackersuisoqarfiup qanimut suleqatigai kommunit allallu Naalackersuisoqarfiit Inatsisartut inatsisaat nr. 21, 13. november 2017-imeersoq malillugu, allangguut uunga Inatsisartut Inatsisaanni meeqqat atuarfiit pillugit § 25 imm. 7,

allaqqaakkamik suliaqartoqassasoq nalunaarummik ilinniartut inaanni najugaqateqartarneq pillugu. Aalajangiinerup pisussaattippai Naalakkersuisut maleruagassanik aalajangersaanissaannut ilinniartut inaanni najugaqateqartarneq pillugu, uani aamma minnerpaamik piumasaqaatit ilinniartut inaasa sinaakkutimikkut annertussusissaat aammalu perorsaattit imarisai pillugit.

Nalunaarummi allaqqaakkap imarissavai ilaatigut aalajangersaanermi piareersaatit ilinniartut iniminni najugaqarnissaannut ilinniartut ataasiakkaat taakkulu angerlarsimaffii, ilinniartup attaveqaatai ilaqtaminut najugaqarnermini, angajoqqaat peqataatinneqarnerat illoqarfigisamullu tikeraarnerit imaluunniit nunaqarfigisamut tikeraarnerit ilanngullugit. Nalunaarusiami allaqqaagaq tusarniutigineqareerput Naalakkersuisunilu suliarineqarnissaa utaqqineqarluni.

4. Elevhjemmini sulisut perorsaariaatsimut piginnaasaasa qaffassarnissaannut Naalakkersuisut suliniutit suut aallartissallugit pilersaarutigaat?

Akissut: Nalunaarut allaqqaagaq ilinniartut inaanni najugaqarneq pillugu, apeqqummut 3-mut akissummiittoq, aalajangersakkanik imaqarpoq ilinniartut inaanni sulisorineqartut pillugit. Allaqqaakkami piumasaqaatigineqarput ilinniartut inaanni aqutsisut ilinniarsimanissaat aamma kommunalbestyrelsep akisussaaffia ilinniaqqinnermut-aamma ilinniagaqqaqinnermut tunngasut ilinniartut inaanni sulisut pillugit.

Ilinniartitaanermut Pisortaqarfiup ilanngullugu suiniutigaa nalunaarutip atuutsilerneqarnissaanut suliniutit ilanngullugit.

Inussiarnersumik inuulluaqqusillunga


Peter Olsen
Naalakkersuisoq